

SA EXAM PAPERS This Paper was downloaded from SAEXAMPAPERS
SA's Leading Past Year

Exam Paper Portal



You have Downloaded, yet Another Great Resource to assist you with your Studies 😊

Thank You for Supporting SA Exam Papers

Your Leading Past Year Exam Paper Resource Portal

Visit us @ www.saexampapers.co.za



**SA EXAM
PAPERS**

SA EXAM PAPERS

Proudly South African



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

XITSONGA: RIRIMI RO ENGETELA RO SUNGULA (FAL)

PAPILA RA VUMBIRHI (P2)

MUDYAXIHI/KHOTAVUXIKA 2025

TIMARAKA: 70

NKARHI: Tiawara ti $2\frac{1}{2}$

Papila leri ri na tipheji ta 21.



SWITSUNDZUXO NA VUXOKOXOKO

Hlaya swiletelo leswi landzelaka hi vukheta u nga si sungula ku hlamula swivutiso.

1. U nga ringeti ku hlaya phepha ra swivutiso hinkwaro. Xiya tafula ra nongonoko wa vundzeni leri nga eka pheji leyi landzelaka kutani u fungha tinomboro ta swivutiso swa tibuku leti u dyondzeke tona lembe leri.

2. Phepha leri ri na swiyenge swa MUNE

XIYENGE XA A: Novhele (35)

XIYENGE XA B: Ntlangu (35)

XIYENGE XA C: Swirungulwana/Swihungwana (35)

XIYENGE XA D: Vutlhokovetseri (35)

3. Hlamula SWIVUTISO SWIMBIRHI, ku suka eka SWIYENGE swin'wana na swin'wana SWIMBIRHI hindlela leyi landzelaka:

XIYENGE XA A: NOVHELE

Hlamula xivutiso xa novhele leyi u yi dyondzeke.

XIYENGE XA B: NTLANGU

Hlamula xivutiso xa ntlangu lowu u wu dyondzeke.

XIYENGE XA C: SWIRUNGULWANA/SWIHUNGWANA

Hlamula swivutiso leswi humaka eka swirungulwana HINKWASWO.

XIYENGE XA D: VUTLHOKOVETSERI

Hlamula swivutiso leswi humaka eka switlhokovetselo HINKWASWO.

Tirhisa tafula ra nongonoko wo tikamba ku vona loko u hlawurile swivutiso hi mfanelo.

4. Landzelela swiletelo leswi nga emasungulweni ya xiyenge xin'wana na xin'wana hi vukheta.
5. Nombora tinhlamulo ta wena ku ya hilaha swivutiso swi nomboriweke hakona eka phepha ra swivutiso.
6. Sungula xiyenge XIN'WANA na XIN'WANA eka pheji YINTSHWA.
7. Nkarhi lowu ringanyetiweke: Tirhisa timinete ta kwalomu ka 75 eka xiyenge xin'wana na xin'wana.
8. Tsala swi basa no vonaka.



TAFULA RA NONGONOKO WA VUNDZENI

XIYENGE XA A: NOVHELE		
Hlamula swivutiso swa novhele leyi u yi DYONDZEKE.		
NOMBORO YA XIVUTISO	TIMARAKA	NOMBORO YA PHEJI
1. <i>Ndzi ngo tinciki!</i>	35	5
XIYENGE XA B: NTLANGU		
Hlamula swivutiso swa ntlangu lowu u wu DYONDZEKE.		
2. <i>Byokota Madlayisana</i>	35	8
3. <i>Ku dyela nyama ematlukeni</i>	35	11
XIYENGE XA C: SWIRUNGULWANA/SWIHUNGWANA		
Hlamula swivutiso leswi vutisiweke eka swirungulwana HINKWASWO.		
4.1 'Machonisi'	17	14
4.2 'Masaseka-fularha'	18	16
XIYENGE XA D: VUTLHOKOVETSERI		
Hlamula swivutiso leswi vutisiweke eka swithokovetselo HINKWASWO.		
5.1 'Ndza swi tiva'	18	18
5.2 'Tsakani hi byona'	17	20



TAFULA RA NONGONOKO WO TIKAMBA LOKO U HLAWURILE SWIVUTISO HIMFANELO:

Tatisa mavangwa lama pfulekeke hi ku tirhisa mfungho wa nghwaju ku kombisa leswaku u hlawurile nhlayo leyi lavekaka ya swivutiso.

NONGONOKO WO TIKAMBA			
XIYENGE	NOMBORO YA XIVUTISO	NOMBORO YA SWIVUTISO LESWI FANELEKE KU HLAMURIWA	MFUNGHO WA NGHWAJU (✓)
A: NOVHELE (Swivutiso swa ximbangu)	1	1	
B: NTLANGU (Swivutiso swa ximbangu)	2–3	1	
C: SWIRUNGULWANA/ SWIHUNGWANA (Swivutiso swa ximbangu)	4	1	
D: VUTLHOKOVETSERI (Swivutiso swa ximbangu)	5	1	
LEMUKA: Tiyisisa leswaku u hlamurile swivutiso eka swiyenge SWIMBIRHI ntsena.			



XIYENGE XA A: NOVHELE**XIVUTISO XA 1: NDZI NGO TINCIKI! – FA Thuketana**

Hlaya ntshaho lowu landzelaka hi vukheta kutani u hlamula swivutiso leswi nga hansi ka wona.

XITSHURIWA XA A

'Mpfuleni u va rhangha hi ku tiehleketi u nga si vulavula na mina. Tsundzuka leswaku ndzi tata wa wena.'

'U tata wa mani? U tata wa mina wena? A ndzi na tatana mina. U tatana wa njhani lowo khoma vana hi tihanyi to tani? I khale u hi xanisa *man*. Se mina ndzi tiyiserile swi ringene, ndzi ri swi ringene. Ndzi karhele *man*, ndzi karhele hi swa muti lowu. Hi fanele nkarhi hinkwawo hi tshama hi lo hlukuvala hikokwalaho ka wena. U ni tihanyi to chavisa *man*, tihanyi ta wena ti hi dyondzise ni vunwa. Hi fanele mikarhi hinkwayo hi hanya hi ku ku lukela mano ya ku ku kanganyisa, hi ku chava ku himeteriwa ni ku holoveriwa. U kanganyisa vanhu va ta tama va ku a hi ku lulama ka wena kasi u bihe, u ntsumi ya Sathana, ho tshama hi kala ro hisa laha mutini.'

'Mpfuleni u vula mani sweswo, u vula mina ku va ntsumi ya ka Sathana?' ku vutisa nkulukumba Ntekele hi ku sungula ku kufumela.

'Ndzi vula mani? Kasi ndzi vulavula na mani un'wanyana kwala? Ndzi vula wena, ndzi ri u hi xanisile swi ringene ... u ni mbilu ya ribye mukhalabye ndzina.'

- 1.1 Boxa vito ra lokixi laha timhaka leti ti humelalaka kona. (1)
- 1.2 Xana a ku humelele yini ku kondza Mpfuleni a vula marito lawa: 'U tata wa mani?' (1)
- 1.3 Xana marito ya Mpfuleni lama nge: 'hi tshama hi lo hlukuvala ... ho tshama hi kala ro hisa' ya tiyisisa hindlela yihi swiendlo swa Ntekele endyangwini wa yena? (2)
- 1.4 Nhlawulo wa marito ya mutsari eka mavulavulelo ya Mpfuleni eka ntshaho lowu ya kombisa yini hi matitwelo ya Mpfuleni. (2)
- 1.5 Hlamula u ku: 'hi swona' kumbe 'a hi swona' kutani u seketela nhlamulo ya wena:
- 1.5.1 N'wa-Xitlhelana a a lovile loko Mpfuleni a holova na tata wa yena. (2)
- 1.5.2 Mpfuleni u landziwile hi Lefty leswaku a ya tshama na yena endzhaku ka ku holova na Ntekele. (2)
- 1.6 Mpfulumpfilu lowu a wu ri kona emutini wa Ntekele wu kanetana na mahanyelo ya Xikriste. Seketela mhaka leyi. (2)
- 1.7 Manayila a ri munhu wo tlhariha no titsongahata. Kombisa ntiyiso wa mhaka leyi. (2)



- 1.8 Ntekele a a ri na manyunyuyu yo tivona a antswa ku tlula vanhu van'wana. Seketela hi leswi humeleleke eka ntshaho lowu. (2)
- 1.9 Nyika vonelo ra wena ehenhla ka matikhomelo ya Muzayiwe ya ku tirhisa xiyimo xa Ntekele ku fikelela makwanga ya yena. (2)

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA B

Hi siku leri tlhandlamaka, ndzhaku ka ku sweka swakudya swa nhlikanhi, Manayila o fika, a kuma ku yime bazi ya nkarhi wa mbirhi hi ndzhenga, hi loko a namba a yi tala ehenhla. Ina, u fanele ku ya vonana ni makwavo Mpfuleni. Tani hilaha swi talaka ku va hakona, loko munhu a kala a kuma ndlela yo phuvula eka mhaka leyi a yi n'wi dya, Manayila a a twa a tsakile. Ni nimpundzu loko a pfuxelana ni tata wa yena loyi a a languteka a ri ni tingana naswona a punyarile, swi tikomba handle ka ku kakananisa leswaku a a nga helanga hi ku byi swinya, u pfuxelane na yena xikandza xa yena xi lo nchanamanaaaa, ongeti a ku vanga na mhaka yo karhata exikarhi ka vona hi xatolo ka kona. Leswi swi hlamarisa nkulukumba Ntekele loyi a a langutele ku n'wi vona a rhwale nomu, xikandza xa yena xi ri karhi xi visungana a ri karhi a endla vukukurukukuru, ku komba ku pfimba chelele. Ina, nkulukumba Ntekele u hlamale ngopfu, a nga twisisi leswaku ntsako lowu a wu vonaka exikandzeni xa Manayila a wu ri wa yini. 5 10

- 1.10 I yini lexi a xi tsakisa Manayila eka siku leri? (2)
- 1.11 Hikokwalaho ka yini nkulukumba Ntekele a a languteka a punyarile? (1)
- 1.12 Xana mutsari loko a ku: '... a ri karhi a endla vukukurukukuru, ku komba ku pfimba chelele ...' Ku pfimba chelele i ku ...
- A yimbelela.
B xurha.
C hlundzuka.
D pfimba. (1)
- 1.13 Hi kwihi ku hambana loku nga kona exikarhi ka vumunhu bya Manayila na Mpfuleni. (2)
- 1.14 Muluthanyi i ximunhuhakwa lexi vangaka dzolonga exikarhi ka ximunhuhawankulu na xisihalari. Hi ku vona ka wena i mani muluthanyi exikarhi ka Manayila na Ntekele? Seketela nhlamulo ya wena. (2)
- 1.15 Hlamusela hilaha rito 'vahedeni' ri hundzukeke xikhovolelo hakona eka vutomi bya Nkulukumba Ntekele? (2)



- 1.16 Hi yihi mhaka leyi a yi ri kona leyi ku vulavuriwaka hi yona eka ntila wa 8, lowu nge: 'Ongeti a ku vanga na mhaka yo karhata exikarhi ka vona hi xatolo ka kona'? (2)
- 1.17 Xana u nga vula yini hi xiboho xa Mpfuleni xa ku lan'wa ndyangu wa ka vona endzhaku ka ku holova na Ntekele? (3)
- 1.18 Ku rhandza ngopfu ku tekeriwa ehenhla swi na khombo. Kombisa vonelo ra wena u kongomisile eka Ntekele. (2)

NTSENGO WA XIYENGE XA A: 35



XIYENGE XA B: NTLANGU**XIVUTISO XA 2: BYOKOTA MADLAYISANA – MM Marhanele**

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA C

MAZIBUKO:	A hi yeni hi ya n'wi boha a ha etelele, kambe loko o pfuka a hi ri vonanga.	
M'SAPA:	Loko a ri mina a ndzi tshineli no tshinela, yanani n'wina tinhenha.	
MAZIBUKO:	Hinkwerhu hi fanele ku boha wanuna loyi.	
M'SAPA:	Mina a ndzi yi. Va tolo va vurile loko va te: 'Tinhenha ti file matoya ya sala ya dlayana ni vuputsu.'	5
MAZIBUKO:	Loko u nga yi hi ta ku hehla evukosini.	
M'ZAMANI:	M'sapa ri swi lava ngopfu ku dlayisa van'wana. Kasi u toya he M'sapa? Wo tiyela ku suma tinsimu emabyalweni. <i>(Va nyantamela ku fana ni ximanga loko xi onga kondlo. Leswi MATHEBULA a etelele bya rifu, naswona a langutile ehenhla wonge u kombela ku hundzuseriwa xinwelo xa rifu hi loyi a nga n'wi tiveki, loyi a nga tshama a twa hi ta yena hi thicara Manganyi wa le Soweto, vavanuna va fikile va n'wi boha. Loko a ku phaphaa! a kuma leswaku va fikile va tirhile ntirho. Hiloko va rhangisana na yena va ya ehosini.)</i>	10
M'SAPA:	Mazibuko ndza ku chava. Loko a ko va mina na M'zamani ingi hi nga dyi endlanga nchumu dyinuna ledyi.	15
M'ZAMANI:	Mina a ndzi nga chavi, a ndzi tivi wena na Khawana?	
MATHEBULA:	Se mi ndzi yisa kwihi? Ndzi tshikeni ndzi sungula hi ku ya teka swiambalo swa mina lahaya.	20

- 2.1 Hi xihhi xivangelo xa ku va vanhu lava va tikumile va ri eka ndhawu leyi? (1)
- 2.2 Xana Mathebula a a ambarile yini eka siku leri? (2)
- 2.3 Handle ka Mathebula, hi byihhi vuxaka exikarhi ka hosi Magamana na vanhu lava nga eka ntshaho lowu? (1)
- 2.4 I yini a a xi chavisa M'sapa eka ntshaho lowu? (1)
- 2.5 Hlawula nhlamulo yin'we eka leti landzelaka:

Marito ya Mhangani ya leswaku 'mhaka leyi ndzi ta yi vona, a yi nga heli ntsena', ya hlamusela leswaku u ta ...

- A rilela.
B rihisela.
C tsutsumela.
D khulela. (1)



- 2.6 Hi wihi ntikelo wa marito ya Mazibuko ya leswaku, 'Mazibuko ndza ku chava'? (2)
- 2.7 Hlamula 'hi swona' kumbe 'a hi swona', u tlhela u seketela nhlamulo ya wena.
Hosi Magamana loko a fanele a ahlula milandzu a rhanganga a endla vulavisisi ku lava ku kuma vumbhoni lebyi tiyeke. (2)
- 2.8 Hlamusela lexi nga endla leswaku Mathebula va n'wi khoma hi ku olova. (2)
- 2.9 Hikokwalaho ka yini Mavundza a tshikelela mhaka ya leswaku Gezani u dlayiwile hi swibakele swa Mathebula. (2)
- 2.10 N'wa-Rimbelule a ri munhu wa ku rhandza ntiyiso na ku tshembeka. Seketela mhaka leyi. (3)

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA D

MABOKORO:	Wansati loyi u ni nhlana o swi thya, thya, hi xin'we-xin'we, hambileswi va nge vavasati va ehleketa hi timbilu loyi u ehleketa hi byongo.	
MAMBURU:	Leswi nga vuriwa hi wansati loyi swa yelana ni leswi hi nga swi twa tolo ni vusiku endlwini ya Mathebula.	5
MAGAMANA:	Hi ku komisa u nga yima wena Mamburu u hlamusela tiko leswi wena ni vandla ra wena mi swi tweke tolo endlwini ya Thebuyi. (MAMBURU a yima a hlamusela hinkwaswo.)	
VANHU:	Mayeke, n'anga hi yona mudlayi lonkulu laha tikweni.	
M'SAPA:	N'anga Mavundza yi pariwile swi le rivaleni.	10
MAZIBUKO:	(A hlevetela.) Mavundza u tidlayisile hi ku thathela ncuva wa Xingoni a tshika wa Xitsonga.	
MAGAMANA:	Vumbhoni bya vudyohi bya n'anga byi ringene ni tiko ri xurhile hi ntiyiso lowu ri wu kumeke. Ndzi nga si nyumisa maxaka, vana, vanakulobye, vasati ni swigangu swa n'anga Mavundza, hi leswi ndzi nga ta endla swona, ndzi rhandza ku tisola eka nkulukumba Mathebula. Wena Mathebula ndzi hosi ya wena, kambe namuntlha ndzi nandza wa wena. Ndzi ku dyoherile ngopfu, hikuva ndzi lavile ku humesa vutomi bya wena u nga ri na xidyoho nandzu. Ndzi ta basisa vito ra wena hi ku ku nyika xitulu eka muganga wun'wana etikweni ra mina. Tiva Thebuyi, a wa ha ri mubohiwa kumbe gayisa, ...	15 20

- 2.11 Xana timhaka leti nga eka ntshaho lowu a ti humelela etikweni rihi? (1)
- 2.12 Nyika mavito ya vanhu lava va twiweke va vulavula endlwini ya Mathebula. (2)



- 2.13 Hlamusela leswi hosi Magamana a tisolaka eka swona eka ntshaho lowu. (2)
- 2.14 Xana hosi Magamana u n'wi khensile hi yini N'wa-Rimbelule? Nyika SWIMBIRHI ntsena. (2)
- 2.15 Kombisa ku titwa ka vaakatiko eka siku leri. (2)
- 2.16 Hi kwihi ku tikeriwa loku Mathebula a langutanile na kona mayelana na nsati wa yena Makhanana eka siku leri? (2)
- 2.17 Hikokwalaho ka yini hosi Magamana loko a vulavula na Mathebula a ku: 'Thebuyi'? (1)
- 2.18 Kombisa ku hambana exikarhi ka vumunhu bya Makhanana na N'wa-Rimbelule. (2)
- 2.19 Nyika vonela ra wena ehenhla ka ku va Mathebula a rivalerile Makhanana. (2)
- 2.20 Nawu wa 'tihlo hi tihlo' lowu a wu tirhisiwa hi hosi Magamana a wu amukeleki eka nkarhi wa sweswi? Seketela. (2)
- [35]**



XIVUTISO XA 3: KU DYELA NYAMA EMATLUKENI – DJ Risenga

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA E

MZAMANI:	U fambile njhani lomu a wu yile kona? Va njhani va ka Piet?	
MA'AM JOYCE:	Va kona. A ku na swo karhata, na yena Vukosi u kona, o karhatiwa hi swivavi ekhwirini. Ndzi n'wi khutazile leswaku swi ta hela nakona a swi na dokodela wo swi tshungula, loko nkarhi wu fikile swi ta nyamalala hi swoxe.	5
MZAMANI:	Swivavi swo tano a swi kombi leswaku u tirhwele? Hikona u swi twa sweswi u nga n'wi endzela, naswona swi endla tin'hweti tingani?	
MA'AM JOYCE:	U vula leswaku i n'hweti ya vukaye.	
MZAMANI:	Loko a nga ku byelangi swa ha suka emasungulweni u endle xihoxo. Yena Vukosi a a fanele a ku byerile wena mana wa yena kutani wena u byela mina. Lo'wa xigangu xakwe Piet a a nga ta vula nchumu eka mina, i swilo swa vavasati.	10
MA'AM JOYCE:	A a nga ri kona. A hi ri vambirhi ntsena. (A nga hlamuli xivutiso xa Mzamani lexo sungula xa ku va Vukosi a vikela mana wakwe swa ha ku sungula, kuveni Vukosi u n'wi byerile. Yena Ma'am Joyce u tshame na swona.)	15
MZAMANI:	Leswi swi nga kusuhi, masiku ya wena yo ya n'wi seketela ya le kusuhi. Hambileswi va nga si tekanaka ximfumo, hi nawu a a fanele a va laha kaya, eka wena mana wa yena. Le ... hi le nhoveni, ...	20

- 3.1 Vanhu lava bulaka laha a va tshama etikweni rihi? (1)
- 3.2 Nyika vito ra ndhawu leyi Ma'am Joyce a endzele eka yona ku kala a vutisiwa leswaku 'U fambile njhani lomu a wu yile kona?' (1)
- 3.3 Xana Piet loyi ku vulavuriwaka hi yena a a tirha ntirho muni? (1)
- 3.4 Vula 'hi swona' kumbe 'a hi swona' kutani u seketela nhlamulo ya wena. Ma'am Joyce a a tshembekile eka nuna wa yena. (2)
- 3.5 Hlamusela ndlela leyi Ma'am Joyce a leleke Mzamani hi yona loko a ya eka Vukosi ro sungula. (1)
- 3.6 Marito lawa ya nge: 'Lo'wa xigangu xakwe Piet' ya paluxa yini hi matitwelo ya Mzamani? (2)
- 3.7 I yini leswi hi kombisaka leswaku Vukosi a teka nkarhi wo leha a nga vonani na tata wa yena? (2)
- 3.8 Hlamusela ndlela leyi Ma'am Joyce a nga seketela Vukosi hi yona eka xiyimo lexi a a ri eka kona. (2)



- 3.9 Maendlelo ya Piet yo lava ku pfuniwa hi Ma'am Joyce mayelana na swa timali a ya amukeleki. Seketela mhaka leyi. (2)
- 3.10 Aneka vonelo ra wena mayelana na vukati bya Ma'am Joyce na Mzamani? (3)

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA F

VHAKISA:	Hi vuyisile ka N'waMzamani. Hambi kona! Yhi! <i>(Muongori u ta na n'wana a n'wi tlakurile. U n'wi nyiketa mana wakwe a n'wi xinga. Hinkwavo va n'wayitela ku katsa na muongori.)</i> Ma yi vona mihlolo ka! I Piet hi yexe! Futhi loko wo kaneta u ta va u hlola!	
PIET:	Hi n'wina mi nga na tihlo ra gama. Mina yo na yi xa.	5
MUONGORI:	Kambe ko va n'wina buti hi n'wexe. Hambi va ku yini, mi lo tiveleka.	
	<i>(Vhakisa na Piet va huma. Va siya Vukosi a ha ri emubedweni. Muongori u tlherisela n'wana ekamareni laha ku nga na vana van'wana.)</i>	
PIET:	..., a mi titwisa ku yini loko Vukosi a wela ehansi nkarhi lowuyani loko a lava ku mi hambanisa na Xilavi?	10
VHAKISA:	Ebyongweni bya mina a ku hlangenehlangene, ndzi vuya ndzi pembunuka ku n'wi vona a wela ehansi. Ku ta ku chava ka leswaku a nga onhakeriwa, kasi va ka Munene va ta hi vhikela va tlhela va amukela n'wana exibedhlele.	15
PIET:	Mi swi tekise ku yini swa vamanana lavaya?	
VHAKISA:	A ku na swin'wana i byalwa lebyi va karhatisaka. Loko a yi nga ri mhaka ya Vukosi a ndzi lava ku n'wi rhidimba loyi Xilavi. Yena byalwa a byi n'wi lawuli ngopfu, kambe ku pyopyiwa a a pyopyiwile.	

- 3.11 Boxa vito ra n'wana wa Vukosi na Piet. (1)
- 3.12 Vito leri thyiweke n'wana wa Vukosi na Piet, ri na nsunsumeto muni eka ntlangu lowu? (2)
- 3.13 Xana Piet u vula yini loko a ku. 'Mina yo na yi xa.' (2)
- 3.14 Hlawula nhlamulo yin'we eka leti landzelaka:

Loko Vhakisa a ku: 'Piet hi yexe!' u hlamusela leswaku n'wana u fana ...

- A na makwavo.
- B na yena.
- C a ri yexe.
- D na hahani. (1)



- 3.15 Xana Vhakisa na Xilavi a a va hambanisiwa loko ku humelela yini? (2)
- 3.16 Marito ya Vhakisa loko a ku: 'Hambi kona! Yhi!' ya paluxa yini hi ku titwa ka yena? (2)
- 3.17 Hlamusela leswi ku tsakisaka hi vumunhu bya Vhakisa. (2)
- 3.18 Handle ka mhaka ya ku velekiwa ka n'wana, hi yihi mhaka yin'wana leyi Ma'am Joyce a nga ya yi rungulela Mzamani. (2)
- 3.19 Eku vuyeni ka Ma'am Joyce hi le ka Vukosi i yini lexi hlamariseke Mzamani mayelana na maambalelo ya yena? (2)
- 3.20 Kun'wana eka tsalwa leri Ma'am Joyce u ri eka Mzamani, 'A ndzi mi kombeli, ndzo mi byela.' Hi ku vona ka wena mavulavulelo lawa ya kombisa yini hi vumunhu bya Ma'am Joyce? (2)

[35]

NTSENGO WA XIYENGE XA B: 35

XIYENGE XA C: SWIRUNGULWANA/SWIHUNGWANA

Eka xiyenge lexi, swivutiso swi huma eka swirungulwana leswi landzelaka:

- 'MACHONISI' hi SJ Malungana
- 'MASASEKA-FULARHA' hi KA Khosa

XIVUTISO XA 4: XAMUGANGA – SJ Malungana na KA Khosa

Hlaya mintshaho leyi landzelaka yo huma eka swirungulwana SWIMBIRHI kutani u hlamula swivutiso swo huma eka xin'wana na xin'wana xa swona. Timaraka leti aviweke eka xivutiso xin'wana na xin'wana i xiletelo xa vulehi bya nhlamulo ya wena.

LEMUKA: Hlamula swivutiso swo huma eka mintshaho HAMIMBIRHI ku nga XIVUTISO XA 4.1 NA XIVUTISO XA 4.2.

4.1 'MACHONISI' – SJ Malungana

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA G

Xi te xiyimo xa ha ri tano, vana va xikolo va ta va ri karhi va yimbelela va ku: 'Tata *gorilla* tana! Hiyoo! Hakamela! Hiyoo!

Huma ni tirhisiti! Hiyoo!
Handle ka swona!
Hiyoo!
Hi ku hisile!

5

Hakamela u lo na swi vonisa sweswo o kongoma fasitere ra hofisi yakwe. Ni laha a nga nghena hi kona a va kumanga ni vuthala. Hi ku hlundzuka, vana va xikolo hi ku pfunana ni vatswari va phikurile Cressida ya Hakamela yi ganama kunene. Leswi a yi swi twile khale, a ku twala vupfoyopfoyo ntsena.

10

Hakamela u nghanile endlwini bya xihuhuri. Nsati u hlamarisiwile hi ku vona nuna a tsutsuma a khomile piki. Hi ku copeta ka tihlo rivanti ri tshwa ni khiya, kutani ku landzela ku mbeyetela ka piki ekamareni. Sorisa u te a ha hlamala leswi a swi endlwiwa hi nuna, a hoxa mahlo yakwe ehenhla ka ntshungu lowu a wu ri karhi wu yimbelela hi ndlela yo komba ku hlundzuka wu kongomile emutini wakwe. Ntshungu lowu loko wu vona Sorisa wu nyanya ku tsutsuma wonge i vahloti lava a va lava ku gajela mpfundla. Ntshungu a wu hetanga nkarhi wu nga rhendzelanga muti wa Hakamela.

15

Sorisa a twa wonge u biwa hi xirhami lexi vangiweke hi ku wa ka gamboko.

4.1.1 I vana va xikolo xihhi lava a va yimbelela eka ntshaho lowu? (1)

4.1.2 Xana Hakamela a endlile yini ku kala vanhu lava va n'wi tela ehofisini na le kaya? (2)



- 4.1.3 Hlamusela leswi susumeteke Hakamela ku endla mhaka leyi u yi boxeke eka 4.1.2. (2)
- 4.1.4 Eka ntila wa 1 mutsari u ri, 'Xi te xiyimo xa ha ri tano,' Xana i xiyimo xihilexi ku vuriwaka xona eka ntshaho lowu? (2)
- 4.1.5 Kombisa ntlimbo wa le handle lowu Hakamela a ri na wona eka xirungulwana lexi. (2)
- 4.1.6 Hlawula nhlamulo yin'we leyi nga yona eka leti landzelaka:
Hi ku ya hi nhlamuselo ya masiku hinkwawo, 'ku mbeyetela' swi vula ku ...
- A ba xilo ko tala.
B wa ka xilo ko tala.
C ta ka xilo ko tala.
D fa ka xilo ko tala. (1)
- 4.1.7 Kombisa mhaka yin'we eka xirungulwana hinkwaxo leyi paluxaka leswaku Hakamela a nga tlharihangile. (2)
- 4.1.8 Vito ra Sorisa ra yelana na mahanyelo ya yena. Seketela mhaka leyi. (2)
- 4.1.9 Hi ku leteriwa hi leswi nga eka ntila wa 19, xana u n'wi twela vusiwana Sorisa ke? Seketela hi leswi nga eka tsalwa hinkwaro. (3)



4.2 'MASASEKA-FULARHA' – KA Khosa

Hlaya ntshaho lowu landzelaka hi vukheta kutani u hlamula swivutiso leswi nga ehansi ka wona.

XITSHURIWA XA H

'Patricia wa ha swi tsakela ku tirha laha kaya hambileswi Mpho a nga kula ke?'	
'Mi vula yini <i>sister</i> ?'	
'Ndzi tsakela leswaku u ya ndzi pfuna le clinic', Bettie a n'wi kombela hi moya lowunene. Patricia a a nga voni xiphiko hikuva Mpho a a yisiwa eElite Creche mixo un'wana na un'wana.	5
Hi minkarhi yo tala hinkwavo a va vuya va karhele entirhweni. Mutirhi wo pfala Patricia le mutini a a nga ha kumekanga. Loko va chayisa ku vuya yi va yona le mutini.	
'Buti Tom, u fanele u vuya u sweka <i>toe</i> !'	10
'Ndza swi twisisa, kambe Patricia u ta hi teka njhani?'	
'A nga hlamarisa hi yini? U dyondzekile n'wana loyi! swo va swa vutomi bya hositele swa nyumisa, phela hi le mutini laha; a hi le Medunsa Bettie <i>man</i> !'	
Bettie u lo na twa leswi o khanisa timhuti, a tlula a tswontswa Tommie.	
'Ndza swi twisisa, <i>darling</i> , ndzi ta endla <i>cool down my baby, please</i> !'	15
Tommie a vula leswi a karhi a vunga-vunga nsati hi swiambalo wonge o va ndzumulo. Ku sukela siku leri dokodela Madambi a va nga ha pfali hi awara ya ntsevu nimadyambu, kambe a va pfala ntirho hi awara ya mune. A va tsutsumela mapoto na wacheni. Ku vuya ka Bettie hi awara ya nhungu nimadyambu a swo fanela swi tshame hi mfanelo.	20

- 4.2.1 Boxa mintirho MIMBIRHI leyinene leyi Patricia a yi endla emutini wa Bettie na Tommie. (2)
- 4.2.2 Dokodela Madambi na *sister* Bettie a va tirha kwihi? (2)
- 4.2.3 Marito lawa, 'Bettie u lo na twa leswi o khanisa timhuti, ...' ya vula yini? (2)
- 4.2.4 Xana maendlelo lawa ya Bettie yo khanisa timhuti na ku tswontswa Tommie ya kombisa yini hi vumunhu bya yena? (2)
- 4.2.5 Marito lama 'Ndza swi twisisa, kambe Patricia u ta hi teka njhani?' ya paluxa yini hi vutihlamuleri bya Madambi tani hi nhloko ya muti? (2)
- 4.2.6 I mani Maseseka-Fulara eka xirungulwana lexi? Seketela nhlamulo ya wena. (2)



- 4.2.7 Marito lawa 'Mutirhi wo pfala Patricia le mutini a a nga ha kumekanga ...' ya hlamusela yini mayelana na ku laviwa ka mutirhi wa le kaya? (2)
- 4.2.8 Mhaka ya ku va Madambi a vuya a sweka na ku hlantswa masiku hinkwawo ya amukeleka ke? Seketela nhlamulo ya wena. (2)
- 4.2.9 Hi ku vona ka wena dyondzo yi swi kotile ku aka Tommie na Bettie loko swi ta eka timhaka ta vutomi ke? Seketela mhaka ya wena. (2)

NTSENGO WA XIYENGE XA C: 35



XIYENGE XA D: VUTLHOKOVETSERI

Eka xiyenge lexi, swivutiso swi huma eka swithhokovetselo leswi landzelaka:

- 'NDZA SWI TIVA' hi KG Baloyi
- 'TSAKANI HI BYONA' hi KG Baloyi

LEMUKA: Hlamula swivutiso swo huma eka swithhokovetselo HASWIMBIRHI ku nga XIVUTISO XA 5.1 NA XIVUTISO XA 5.2

XIVUTISO XA 5

5.1 Hlaya xithhokovetselo lexi landzelaka hi vukheta kutani u hlamula swivutiso leswi nga ta xi landzela. Timaraka leti aviweke eka xivutiso xin'wana na xin'wana i xiletelo xa vulehi bya nhlamulo ya wena.

Hlaya xithhokovetselo lexi nga laha hansi kutani u hlamula swivutiso leswi nga ehansi ka xona.

NDZA SWI TIVA – KG Baloyi

- 1 U nga kali u ndzi holovela,
- 2 U nga kali u ndzi hlundzukela u ndzi chovola,
- 3 Ndzi swi tiva swinene,
- 4 Leswaku wena hi wena,
- 5 A wu ndzi kohli ndza ku tiva.

- 6 Vona, ndza ku xixima,
- 7 Ndza ku chava,
- 8 A wu voni a ndzi na nomo eka wena,
- 9 Ndza ku tiva wena,
- 10 U nga ndzi hamuti ndzi tweli vusiwana.

- 11 Maxangu ni mavonavona ya misava ndza swi vona,
- 12 A ya nandzihi ndzi ma twile,
- 13 Ntshiva wa nkarhi ndza wu tiva,
- 14 Kunene wona a wu tiyeleki,
- 15 Kambe u nga si ndzi londzovota.
- 16 U nga ndzi jahi ndzi ta eka wena,
- 17 A ndzi nge teki hi munhu u nga chavi,
- 18 Hi wena ntsena u nga ta ndzi londzovota,

- 19 Ndzi tshikenyana,
- 20 Ndzi nyike nkarhinyana ndzi hlanganisa,
- 21 Ndzima leyi Mumbi a nga ndzi nyika yona,
- 22 U nga ndzi holoveli ndzi wa wena.

- 23 Khwiri ra misava i rikulu,
- 24 Kasi hikwalaho ka yini ku fa ku nga fi?
- 25 Fana wena rifu hi ta wisa.



- 5.1.1 Hi mintila leyi nga hundziki mune boxa hungunkulu leri mutlhokovetseri a lavaka ku ri fikisa hi xitlhokovetselo lexi. (2)
- 5.1.2 Nyika nhlamuselo ya rito 'Mumbi' eka xitlhokovetselo lexi. (2)
- 5.1.3 Mutlhokovetseri u hlamusela yini hi ntila wa 24 lowu nge: 'Kasi hikwalaho ka yini ku fa ku nga fi?' (2)
- 5.1.4 Boxa xikongomelo xa mutsari eka xitlhokovetselo lexi. (2)
- 5.1.5 Hlawula nhlamulo yin'we leyi nga yona eka leti landzelaka xivutiso.
Marito ya 'Ntshiva wa nkarhi ...' eka ndzimana ya vunharhu ya vula ku ... ka nkarhi?
A yima
B fika
C famba
D xanisa (1)
- 5.1.6 Ku vuyeleriwa ka rito ra '**Ndzi**' eka mintila ya 19 na 20 swi komba ntshikelelo. Hi yihi mhaka leyi ku tshikeleriwaka yona? (2)
- 5.1.7 Kombisa thoni leyi tisiwaka hi mintila ya 19 na 20 eka ndzimana ya 4. Seketela nhlamulo ya wena. (2)
- 5.1.8 Tsavula ntila eka ndzimana ya vumbirhi lowu vulaka leswaku a nga na wona marito eka leswi a kongomaneke na swona. (2)
- 5.1.9 Ku va xitlhokovetselo xi hela hi ndzimana ya mintila yitsongo eka tindzimana letin'wana swi kombisa ku hela ka swilo swimbirhi. Andlala vonelo ra wena ehenhla ka mhaka leyi. (3)



- 5.2 Hlaya xitlhokovetselo lexi landzelaka hi vukheta kutani u hlamula swivutiso leswi swi nga ehansi ka xona.

TSAKANI HI BYONA – KG Baloyi

- 1 Vutomi a byi lavi ku chacheriwa marhonge,
- 2 A byi lavi ku humeseriwa ntshiva,
- 3 A byi lavi ku dlembadlembisiwa,
- 4 Vutomi a byi lavi ku sohasohiwa.

- 5 Byi fundzhe byi ta ku fundzha,
- 6 Byi ondli, na byona byi ta ku ondlavu,
- 7 Kambe loko wo byi swirha,
- 8 Byi ta ku vindza ndza ku byela.

- 9 Kunene vutomi i vutomi,
- 10 N'wina mi ngo dineka mi diniwa hi yini xana?
- 11 Mi ri mi diniwa hi vutomi?
- 12 Mi nga dineki, vutomi a byi dini,
- 13 Kumbe mi diniwa hi munhu,
- 14 Kumbexana i swiyimo,
- 15 Vutomi mi nga byi pumbi.
- 16 Vutomi i nyiko yo ta kan'we emunhwini,
- 17 Loko yo ka yi famba yi fambile,
- 18 Loko yo ka yi muka ku' i Magaisa ku to sala vito.

- 19 Tsakani,
- 20 Kunene tsakani mi tsakisisa,
- 21 Dyanani vutomi mi tiphina ha byona,
- 22 Kambe mi nga dyi mi mita ni marhambu ya byona,
- 23 Mi nga ta tlimbiwa mi ka' na wo mi koka tindleve,
- 24 Tlangani xiphasanhongani mi hlekelela,
- 25 Mi phokotela mavoko mi tsaka.

- 5.2.1 Hi mintila leyi nga tluliki MUNE nyika mongo wa xitlhokovetselo lexi. (2)
- 5.2.2 Tsavula marito eka ndzimana ya 1 lama vulaka leswaku nkanu a yi laveki evuton'wini. (2)
- 5.2.3 Mbuyelelo wa marito 'a byi lavi ku ...' eka ndzimana ya 1 wu tshikelela mhaka yihi? (2)
- 5.2.4 Hi swihi swin'wana leswi mutlhokovetseri a kumbetelaka leswaku hi swona swi karhataka vanhu evuton'wini eka ndzimana ya 3? (2)



- 5.2.5 Xana rito 'muka' eka ntila wa 18 ri vula yini eka xitlhokovetselo lexi? (2)
- 5.2.6 Hlawula nhlamulo yin'we leyi nga yona eka leti nga ta landzela laha hansi.
- Rito rin'wana leri vulaka ku dina laha ka xitlhokovetselo i ...
- A ntshiva.
B swirha.
C fundzha.
D vindza (1)
- 5.2.7 Nyika dyondzo leyi u yi kumeke eka xitlhokovetselo lexi. (2)
- 5.2.8 Xana xitlhokovetselo lexi xi ku lemukisa yini? (2)
- 5.2.9 Xana u titwa njhani endzhaku ka loko u hlayile xitlhokovetselo lexi? (2)
Seketela nhlamulo ya wena.

NTSENGO WA XIYENGE XA D: 35
NTSENGO WA TIMARAKA: 70

